

AUGLÝSING

um staðfestingu reglugerðar fyrir Tónlistarskóla Garðabæjar.

Með vísan til 2. gr. laga um fjárhagslegan stuðning við tónlistarskóla, nr. 75/1985, staðfestist hér með reglugerð fyrir Tónlistarskóla Garðabæjar, sem samþykkt var af bæjarstjórn Garðabæjar hinn 3. desember 1992 og birtist sem fylgiskjal með auglýsingu þessari.

Auglýsing þessi öðlast þegar gildi.

Menntamálaráðuneytinu, 26. mars 2009.

Katrín Jakobsdóttir.

Halldór Arnason.

Fylgiskjal.

Reglugerð fyrir Tónlistarskóla Garðabæjar.

1. gr.

Skólinn heitir Tónlistarskóli Garðabæjar. Skólinn er eign Garðabæjar og fer bæjarstjórn Garðabæjar með yfirstjórn hans. Skólinn starfar samkvæmt lögum um fjárhagslegan stuðning við tónlistarskóla nr. 75/1985, með síðari breytingum.

2. gr.

Markmið skólans er að veita almenna tónlistarfræðslu, stuðla að iðkun tónlistar og vinna að eflingu tónlistarlífs í Garðabæ.

Þessum markmiðum hyggst skólinn meðal annars ná með því:

að halda uppi kennslu, í sem flestum greinum tónlistar, þar sem nemendum er gefinn kostur á að stunda nám eftir því sem aðstæður leyfa og með samvinnu við aðra skóla og uppeldisstofnanir um þessa fræðslu;

að búa nemendur undir framhaldsnám í tónlist;

að gera fullorðnum Garðabæingum kleift að auðga tímstundir sínar með tónlistariðkun eftir því sem kostur er;

að leggja áherslu á félagslegt gildi tónlistariðkunar með þátttöku nemenda í samleik og samsöng;

að skólinn eigi hljóðfæri sem verði leigð nemendum eftir því sem kostur er.

3. gr.

Bæjarstjórn Garðabæjar kýs fimm menn í skólanefnd Tónlistarskóla Garðabæjar og jafn marga til vara til fjögurra ára í senn að loknum hverjum reglulegum sveitarstjórnarkosningum. Jafnframt kýs bæjarstjórn formann og varaformann. Á fyrsta fundi skólanefndar skal kosinn ritari sem færir fundargerðir í gerðabók. Afrit af fundargerðum skulu send bæjarstjórn. Allir þeir sem hafa seturétt á fundi skólanefndar sem og varamenn þeirra skulu fá afrit af fundargerðum skólanefndar.

4. gr.

Skólanefnd hefur yfirumsjón með rekstri skólans í umboði bæjarstjórnar. Formaður nefndarinnar boðar til fundar með dagskrá svo oft sem þurfa þykir og er skylt að boða til fundar ef tveir nefndarmenn, skólastjóri eða kennarafundur æskir þess. Skólastjóri eða staðgengill hans situr skólanefndarfundi.

5. gr.

Bæjarráð ræður skólastjóra og aðra fasta starfsmenn að fengnum tillögum skólanefndar. Stundakennara og aðra starfsmenn, sem ráðnir eru til skemmri tíma, ræður skólastjóri í samráði við bæjarstjóra og skólanefnd, enda liggja fyrir samþykki bæjarstjórnar fyrir þessum stöðum sem í er ráðið við skólann.

6. gr.

Skólastjóri og skólanefnd hafa forystu um að móta listræna og faglega stefnu skólans. Skólastjóri fer með daglega stjórnun. Hann ber ábyrgð á að skólastarfið sé í samræmi við samþykktu kennslu- og fjárhagsáætlun. Hann skal framfylgja samþykktum skólanefndar enda samrýmist þær fjárhagsáætlun skólans. Skólastjóri ráðstafar húsnæði og hefur yfirumsjón með eigum skólans. Skólastjóri kemur fram fyrir hönd skólans gagnvart starfsmönnum og nemendum svo og aðilum utan skólans. Skólastjóri skal skila vinnuskýrslum starfsmanna til launadeildar bæjarins og árita reikninga til greiðslu.

7. gr.

Skólastjóri skal í nóvember ár hvert gera kennsluáætlun næsta skólaárs í samráði við bæjarritara Garðabæjar. Skólastjóri skal semja drög að fjárhagsáætlun fyrir bæjarstjórn til endanlegrar afgreiðslu.

8. gr.

Yfirkennari er skólastjóra til aðstoðar og starfar að stjórn skólans í umboði hans. Hann er staðgengill skólastjóra í fjarveru hans.

9. gr.

Rekstur skólans skal greiðast með fjárveitingum á fjárhagsáætlun Garðabæjar, skólagjöldum nemenda og öðrum þeim tekjum sem skólanum kunna að áskotnast. Bæjarskrifstofur Garðabæjar annast greiðslur launa og rekstrarreikninga, sem og bókhald Tónlistarskóla Garðabæjar.

10. gr.

Starfstími skólans er níu mánuðir frá 1. september ár hvert. Leyfi yfir starfstímann skulu vera þau sömu og í grunnskólum bæjarins.

11. gr.

Að jafnaði skal ekki krafist inntökuprófs í skólann, en skólinn áskilur sér rétt til þess að víkja nemanda úr skólanum ef kennari eða skólastjóri telja hann ekki sýna þá hæfni eða ástundun sem þeir telja nauðsynlega til árangurs.

12. gr.

Skólagjöld eru ákveðin af bæjarstjórn að fengnum tillögum skólanefndar. Skólagjöld skal greiða í upphafi skólaárs fyrir allt skólaárið og geta nemendur einungis fengið skólagjöld endurgreidd ef þeir hætta námi vegna veikinda eða brottflutnings.

13. gr.

Nemendur skulu taka þátt í tónleikum skólans eftir tilmælum skólastjóra eða kennara. Ennfremur ber nemendum skylda til að taka þátt í samleik eða samsöng sé þess óskað.

14. gr.

Reglugerð þessi er samþykkt af bæjarstjórn Garðabæjar þann 3. desember 1992.